

新鑄古今事物原始全書

新鐫古今事物原始全書堪輿輯要卷之三

明

臨安徐炬明夫采輯
仁和張棟仲明校正

京師

帝王世紀曰夏曰邑商周曰京師注云京大也師衆也大眾所居故名天子所居曰京師按漢唐宋並建兩京然漢皆以長安為西京洛陽為東京宋以汴梁為東京以洛陽為西京我

朝以南北兩京為稱蓋跨江之南北各為一大都會

兩京

兩

北京古幽薊之地左環滄海右擁太行北枕居庸南襟河濟形勝甲於天下誠所謂天府之國也遼金元雖常于此建都然皆以夷狄入主中國不足以當形勢之勝至我

太宗文皇帝乃龍潛于此及纘承大統遂建為北京而遷都焉予以統萬邦而撫四夷真足以當形勢之勝為萬世不拔之鴻基自唐虞三代以來未有過焉建置沿革順天府按禹貢冀州之域天文尾箕分野高暢氏謂之幽陵陶唐曰幽都虞為幽州夏殷省幽入冀又為冀州地周復置幽州武王封堯後于薊封

召公奭于燕即此秦為上谷漁陽二郡地漢初為燕國又分置涿郡元狩中改燕國為幽州元鳳初改為廣陽郡本始初更為廣陽國東漢省廣陽合上谷永光初復立廣陽郡後罷郡立幽州治薊三國魏為燕國晉改范陽國後魏於薊立燕郡又於郡置幽州北齊于幽州置東北道行臺後周改置燕及范陽二郡兼立總管于幽州隋開皇初郡廢州存後省州入涿郡唐武德初改為幽州總管府開元間改州為范陽郡乾元初復為幽州遼陞幽州為南京幽都府後改幽都為析津府宋宣和中改名燕山府尋復入金稱

燕京改號中都以析津府為大興府元初為燕京路
號大興府至元初建中都後改為大都路

本朝洪武初改為北平府永樂初改為順天府領四
州二十三縣

南京古金陵之地自周末時已有王氣始皇秦氏謂
東南有天子氣諸葛亮謂龍蟠虎踞真帝皇都即此
地也吳晉宋齊梁陳及南唐雖嘗于此建居無功以
嘗之僅保一隅不能混一天下至我

太祖高皇帝功德隆盛奄有四海乃定鼎于此為京
師始足以當形勢之勝永樂初于北平肇建北京正

統中以北京為京師遂以此為南京實根本之重地
建置沿革按禹貢揚州之域天文斗分野春秋屬吳
戰國屬越後屬楚上威王初置金陵邑因其地有王
氣埋金以鎮之故名始皇以金陵有都邑之氣改曰
秣陵屬鄣郡漢改鄣郡為丹陽郡武帝後揚州刺史
治此吳自京口徙都于此改為建業晉平吳改建業
為秣陵尋分秣陵北為建業改業為鄴建興初改為
建康東晉元帝復都此置丹陽郡宋齊梁陳因之隋
平陳廢郡更于石頭城置蔣州唐武德初置揚州後
復為蔣州又為揚州大都督府尋罷至德初置江寧

郡乾元初改為昇州後廢復置五代時吳楊建大都督府尋改為金陵府又改為江寧府南唐李氏都之宋復為昇州仁宗陞為江寧府建康軍節度高宗改為建康府建行都置行宮留守元正元中改為建康路元貞初立江南諸道行御史臺天曆初改集慶路本朝丙申年改為應天府領七縣

十三省

山西山東河南陝西浙江江西湖廣四川福建廣東廣西雲南貴州各置承宣布政使司

邦畿

詩云邦畿千里注云畿與圻同左傳云天子之地二
圻王畿之外五百曰侯畿曰甸畿曰男畿曰采畿曰
衛畿曰蠻畿曰夷畿曰鎮畿曰蕃畿其上九畿相去
各五百里按成周之時立司馬之官設六軍之衆因
井田而制軍賦地方一里為井井十為通通十為成
成方十里成十為終終十為同同方百里同十為封
封十為畿畿方千里有稅有賦稅以足食賦以足兵
故四井為邑四邑為丘丘十六井也有戎馬一匹牛
三頭四丘為甸甸六十四井也有戎馬四匹兵車一
乘牛十二頭甲士三人卒七十二人干戈備具是為

乘馬之法天子畿方千里提封百萬井定出賦六十萬井戎馬四萬匹兵車萬乘故稱萬乘之主一同百里提封萬井定出賦六十四百井戎馬四百匹兵車百乘此卿大夫采地之大者也是為百乘之家一封三百六十里提封十萬井定出賦六萬四千里戎馬四千匹兵車千乘此諸侯之大者也是謂千乘之

國

都邑

釋名曰國君所居曰都帝王世紀曰太昊都陳此稱都之始也許氏說文云有先君之舊宗廟曰都史記

貨殖傳曰殷人都河內周人都河南唐人都河東夫
三河者天下之中王者所更居也故洛陽稱東都長
安稱西都東平府稱中都西川稱成都陳大猷曰成
王都鎬京居天下之至險復居洛邑居天下之至中
謂之東都朝諸侯而定鼎焉朱子曰冀州正是天地
中間好風水山脉從雲中發來雲中正高脊處脊西
之水西流入于龍門西河脊東之水東入于海前黃
河右華山至中為嵩山是謂前案泰山聳于左淮南
諸山為第二重案江南諸山為第三重案觀是言也
則知古今建都之地莫過于冀州可知矣就朱子風

水之說不見于經典起于晉之郭璞謂無風以散之
有水以界之也冀州之中三面距河處是為平陽蒲
坂乃堯舜建都之地焉其東北之境是為幽州大行
西來綿亘魏晉燕趙之境東極于醫巫閭山重崗疊
阜鸞鳳峙而蛟龍走護持圍繞不知幾千萬重也其
東一帶即汪洋大海稍北乃古之碣石稍南則九河
浴日月而浸乾坤所以界之者又如此况居直北之
地上應天垣之紫垣形勢全而風氣密我

太宗文皇帝初建藩于茲既而入正大統乃循成王
宅洛故事又于此而建都焉蓋王氣所在也前乎元

而為宋宋都汴梁前乎宋而為唐唐都于秦唐之前
則兩漢前都秦而後洛皆非此州境也元人雖居于
此然夷狄雜氣不足以當帝王之統惟我

朝得國之正同乎堯舜拓地之廣過于漢唐自古建
都之地上得天時下得地勢中得人心未有如今日
者况此乃蘇秦所謂天府百二之國杜牧所謂王不
得不可以為王之地是也漢初婁敬過洛陽見漢高
祖曰陛下都洛欲與周室比隆哉上曰然敬曰秦地
披山帶河四塞以為固卒然有急百萬之衆可立具
也夫與人鬪不搯其吭拊其背未能制其勝也今陛

下按秦之故地此亦扼天下之吭而拊其背也上問張良良曰關中左殽函右隴蜀沃野千里南有巴蜀之饒北有胡苑之利阻三面而守以一面東制諸侯所謂金城千里天府之國也敬說是上即西都關中按此以來秦都長安之始漢光武車駕入洛陽幸南官遂定都焉此後世建都洛陽之始諸葛亮至京口因觀秣陵山阜漢曰鍾山龍蟠石城虎踞此帝王之宅按自古帝王之都多在江北而江南形勢之地草若金陵自孫吳都此繼以東晉宋齊梁陳終于南唐凡五代皆偏安一隅惟我

高皇帝定鼎金陵天下萬世之大利也

文皇帝遷都金臺天下萬世之大勢也蓋財賦出于東南而金陵為其會戎馬盛于西北而金臺為其樞用東南之財賦統西北之戎馬開闢以來未之有也

十二州

舜典肇有十二州十有二牧禹貢禹敷土隨山刊木奠高山大川周禮職方氏掌天下之圖乃辨九州之國使同貫利謂一天下之財用養天下之人民使同享其利漢地理志武帝開地斥境南置交趾北置朔方九州鯨徐梁幽并夏商之制改雍曰涼改梁曰益

九十三部曰豫冀衮徐青荆揚益涼幽并交唐太宗以民少吏多悉并省之因山川形便分為十道曰關內曰河南曰河東曰河北曰山南曰隴右曰淮南曰江南曰劍南曰嶺南宋太宗分天下為十五路仁宗析為十八路神宗又析為二十三路曰涼東東西曰京南南北曰河北東西曰河東曰陝西二路曰兩浙二路曰淮南東西曰江南東西曰荆湖南北曰成都等四路曰福建曰廣南東西曰燕山府本朝內有兩京畿外有十三布政司畿內郡縣親領于六部故曰直隸而有南北之分惟內京府南白應

天北曰順天在

天子輦轂之下與諸司相頡頏不以直隸稱焉

九州

禹貢九州冀衮青徐揚荆豫梁雍周禮九州揚豫青衮雍幽冀并蒯荆爾雅九州冀豫雍荆揚衮徐幽營周禮多幽并而少冀徐梁爾雅多幽營而少青梁或謂并青于徐分梁于雍徐舜肇有十二州分冀為幽并分青為營是禹貢之成前于舜典之故也

城郭

易坎之彖曰天險不可升也地險山川丘陵也王公

設險以守其國周禮有掌同掌修城郭溝池樹渠之
固按漢書神農有石城十仞湯池百步軒轅本紀黃
帝造五城淮南子曰鯀作九仞之城博物志曰大禹
作城強者攻弱者守敵者戰城郭蓋自禹始然以軒
轅本紀考之城池之利肇于神農盛于軒轅非鯀禹
始矣而長城始于秦昭王于隴西北地築長城以拒
胡後秦始皇信讖以為亡秦者胡也遂大築長城以
拒胡殊不知其子胡亥而亡秦西都賦云金城萬雉
注云方丈為堵三丈為雉公羊傳云五板而堵五堵
而雉五雉而城天子之城千雉高七雉公侯百雉

五雉子男五十雉高三雉按五經異義曰天子城高九仞公侯七伯五子男三八尺曰仞管子曰內謂之城外謂之郭吳越春秋曰繇築城以衛君造郭以守民史記以為造城郭之始隍者何也按許慎說文云隍城池也易曰城復于隍是也

山

爾雅云有石曰山釋名云山頂曰冢山脊曰崗大而高曰嵩小而高曰岑銳而高曰嶠卑而大曰廡小而衆曰巋上太下小曰嶠有草木曰岵無草木曰煨石戴土曰岨土戴石曰崔巍山足曰麓山穴曰岫未及

上曰翠微。上秀者曰峯。土山曰阜。曲阜曰阿。大阜曰陵。小阜曰丘。十洲記云：海中山曰島，海中洲曰嶼。

水

文子曰：水之道上天曰雨露，下地曰江河。北曰陽水，南曰陰水。山石間出者曰澗，通流曰川。水本曰源，源水曰泉。深水曰潭，急水曰流。沙石上水曰瀨，別流曰派。風吹水湧曰波，大波曰濤，小波曰淪。平波曰瀾，直波曰涇。水朝夕而至曰潮。風行水成紋曰漣，水波如錦紋曰漪。爾雅云：山夾水曰澗，水小口別通曰浦。注溪曰谷，小洲曰渚。泉正出曰濫，泉側出曰汎。泉湧出

曰瀆水神曰天吳八首而八尾亦曰水伯大海之神
曰陽侯濤神曰靈胥而馮韜夷河伯皆水神也

潮汐

說文云朝曰朝夕曰汐臨安志高麗圖經潮汐往來
應期不爽為天地之至信山海經以為海鰐出入之
度浮屠書以為神龍之變化海嶠志以為水盈月之
盈虧盧肇以為日出于海衝擊而成侯博雅正之

四海

釋名云海者晦也主引濁穢東曰渤海西曰青海南
曰張海北曰瀚海天下之水莫大于海萬川歸之無

止息而不盈而尾閭洩之莊子曰東海洩水之處名曰沃焦有一石方圓四萬里海水注之而不溢唐書會要曰天寶十年封東海為廣德公南海為廣利公西海為廣潤公北海為廣澤公宋真宗康定元年詔加東海淵聖廣德王南海洪聖廣利王西海通聖廣潤王北海冲聖廣澤王南海之帝名儵楷北海之帝名忽楷中央海帝名曰渾沌而儵忽鑿渾沌之竅七日而渾沌死

五湖

水經曰五湖者射貴湖曰上湖曰洮湖曰瀾湖曰

湖或以鄱陽湖青草湖洞庭湖丹陽湖太湖為五湖
或以洞庭湖應澤湖青草湖雲夢湖巴丘湖為五湖
或以為太湖其派有五故名五湖炬按蘓州圖經云
太湖接蘇常湖秀四州之界范蠡載西施而泛五湖
當在此

三江

按禹貢云三江既入震澤底定岷為大江至九江為
中江至徐陵為北江韋昭云三江者荆江松江浙江
九江者一烏白江二蟬江三烏江四嘉靡江五畎江
六源江七廩江八提江九菌江

三川

地理志云三川者河洛伊是也或曰經洛渭四川者
成都潼州利州夔州是也

三河

唐都河東殷都河內周都河南為天下之中九河者
一徒駭二太史三馬峽四覆釜五湖蕪六鈞盤七簡
河八絮河九高津

九澤

一大陸二雷夏三大野四彭蠡五震澤六雲臺七滌
澤八荷澤九孟諸寰宇記云八澤皆有一二餘里其

小者雲夢澤亦方九百里

三峽

大明一統志云巴陵楚地有三峽曰明月峽巫峽廣澤峽

五嶽

泰山為東嶽在山東泰安州華山為西嶽在陝西華陰縣衙山為南嶽在湖廣衙山縣漢武帝以衙山遠以霍山代之恒山為北嶽在大同府渾源州中嶽嵩山在河南府登封縣唐會要曰武后垂拱四年封嵩嶽為大中正萬歲通天元年尊為皇帝中宗神龍元

年復為王睿宗封為西嶽金天王開元十三年封泰山為天齊王天寶五年封中嶽為中天王南嶽為司天王北嶽安天王宋朝會要曰大中祥符元年詔泰山為天齊王加號仁聖天齊王四年二月西嶽順聖金天玉二十六日又加號中天王為崇聖中天王五月加上中嶽曰中天崇聖帝東嶽曰天齊仁聖帝南嶽司天昭聖帝西嶽金天順聖帝北嶽曰安天元聖帝

五鎮

沂山為東鎮在青州臨朐縣吳山為西鎮在隴州會

稽山為南鎮在浙江山陰縣醫巫閭山為北鎮在遼東廣寧衛霍山為中鎮在山西霍州東西嶽鎮相去不遠北嶽北鎮相望千里而山脉一帶惟南嶽去南鎮三千餘里雖同在江南而隔絕不相屬中嶽中鎮南北對峙而黃河界之今

京師正當北嶽北鎮之中隋書云開皇十四年立冀鎮霍山祠天寶十年正月始封東鎮沂山為東安公南鎮會稽為承興公西鎮吳山為成德公中鎮霍山為應聖公北鎮醫巫閭山為廣寧公

五嶺

張耳傳南有五嶺之戍一大瘦嶺二始安嶺三臨賀嶺四桂陽嶺五揭陽嶺又云大瘦嶺贛州永明嶺道州白芒嶺道州臘嶺郴州越城嶺靖江

黃河

河圖云黃河出于崑崙山東北角剛山東北流千里折西而行至于蒲山南流千里至于華山太陰東流千里至于桓雍北流千里至于下津河水九曲長者九千里入于渤海

地

周禮大司徒掌輿地周知廣輪之數博物志曰地有

四柱三千六百軸犬牙相牽河圖括地象曰地有三
百六十軸東西二億三萬三千里南北二億三萬一
千五百里頃峻始學篇云天皇氏生于提地之國提
地乃國石而土地國邑之有名自天皇氏始

府

漢制三公開府之始故稱三府魏晉以後諸王皆稱
府唐高宗制總管府後改都督府開元三年始改京
兆河南曰府

郡縣

史記秦始皇初并天下始分天下為三十六郡置守

丞尉各一人說文云天子地方千里分為百縣四郡
秦孝公并諸小鄉為縣始皇以郡領縣隋開皇二年
罷郡以縣隸州按周禮遂人掌邦之野以土地之圖
經造縣鄙形體之法以五家為隣五隣為里四里為
鄰五鄰為鄙五鄙為縣五縣為遂皆有地域溝樹之
此成周六遂之法也然則縣亦周制云

山川名

按史記人皇以來而土地皆有名焉如神農生于厲
山黃帝生于姬水此山川有名之始也又云人皇氏
相厥山川分為九區又按尚書呂刑曰禹平水土主

名山川凡天下之山川無名者皆始名之矣

里路

山海經曰黃帝命豎亥步天地四海之內東西二萬八千里南北二萬六千里淮南子曰禹使大章步天地自東極至西極二十三萬三千五百里七十五步南極至北極二千三萬三千五百里七十五步又八極之廣東西二十三萬三千里南北二十三萬一千里黃帝有記里之車然則里路之記自黃帝始禮記五家為隣五隣為里尚書云六尺為步三百步為里

井田

荊州記云神農既生九井自穿理或然也淮南子曰伯益作井世言市井者邑居為市野廬為井又云市者交易之處井者共汲之所分寧縣西二十里江心有雙井在山谷所居之南此水造茶絕妙白州雙角山下梁氏女美晉石崇以珠玉三斛買之飲此井水者生水身美間里以為女美無益以巨石鎮之以後生水雖美而肢體不完杜佑通典曰黃帝時八家為井井開四道而分八宅鑿井于中井之原其來尚矣而曰則始于黃帝立步制畝司馬法以六尺為步顧野王曰秦孝公以二百四十弓為一畝弓長六尺二

寸五分乃鈔尺五尺也周顯王時衛鞅变法廢井田之制開阡陌之始東千曰阡南北曰陌

苑囿

漢之上林苑即秦之舊園計三百里有離宮七十所漢武帝置甘泉苑五百四十里隋煬帝作園三百里其內為海十餘里為蓬萊方丈瀛州山高于水百餘尺按史記黃帝時麒麟遊于苑囿之始

市廛

易曰包犧氏作教民日中為市之始致天下之民聚天下之貨交易而退周禮司市掌市之治教民刑量

度禁令大市日昃而市而朝市朝時而市夕市夕時而市有胥師掌其次之政令平其貨賄焉有賈師注云知物價者各掌其貨賄辨其物而均平之漢武帝用桑弘羊置均輸官于郡國盡籠天下之貨貴則賣之賤則買之富商大賈亡所牟其利而物價不得騰湧抑天下之物名曰平準王莽于長安及五都立五均官按周官立五均官以均市價立錢府以收滯貨所以便民也今莽借五均錢府之說而立官是擾天下之貨也唐德宗以宦者為宮中市使又置白望數百人抑買人物以紅紫染故衣敗繒尺才裂而給之

仍索進奉門戶及脚價錢名為官市其實奪之炬按周禮地官司市以次序分地而經市以陳肆办物而平市以政令禁物靡而均市以商賈阜貨而行市可謂立市法之善矣所謂廛者按許慎說文云廛者乃居民區域之稱孟子曰願受一廛而為氓是也

坊鎮

演義云坊者方也言人所居之里為方也漢宮闕洛陽故宮有九字坊而太子之宮名曰春坊按史記周末殺萇弘于蜀其血碧色數里之土色皆青故蜀有青泥坊然則坊之名始于周末時矣按周禮注揚州

會稽山霍州霍山青州沂山幽州醫巫閭山背山之
重大者謂之四鎮史記云唐有蕃鎮二朝雖有震之
名末以為市鎮之設至後周武帝始置之

鄉遂

周禮大司徒施教法于邦國都鄙以五家為比使之
相保五比為閭使之相受四閭為族使之相葬五族
為黨使之相救五黨為州使之相調五州為鄉使之
相賓此為天子畿內也此成周六鄉之制秦制十里
一亭十亭一鄉漢時以鄉屬縣唐宋至今皆因之

村庄

原缺

塢小障也董卓築塢于郿號萬歲塢呂布殺董卓于塢中有金三萬勛銀九萬勛積穀三十年之儲學記扁云古之教者家有塾三代間有之二十五家為閭閭在一巷上自有門上側有塾今云某處書塾是也

壘阪

設文云壘土隴也又冢也禮記適墓不登壘又田中高處通作龍壘隴三字通用孟子龍斷而登之是也說文云阪亦作坂山坡也王楊為益州刺史行至邛崃九折阪嘆曰奉先人之遺體柰何數乘此險王尊為刺史問曰此非王楊所畏之道邪叱其御曰驅之

故漢史云王楊為孝子王尊為忠臣隋崔曠字祖濬
隋煬帝問何處有羊腸阪曰按漢書上黨壺關縣有
羊腸阪帝曰不是又曰按皇甫士安地理書太原地
九十里有羊腸阪帝曰此是崔祖濬所以聞一知二

崑洞

臨安縣玲瓏山有九折崑盤屈九折直通絕項茅君
內傳云大天之內有洞三十六所第一洞天王屋山
之洞周圍万里名曰少有清虛之天

冢墓

說文云冢高墳也胡中之草盡白惟昭君冢上之草

獨青故名青冢陳州柳湖有鉄墓乃陳胡公之墓恐
有水浸以鉄銅之虞姬墓詩云劉項佳人總可憐英
雄無設庇嬋娟咸姬葬處君知否不及虞兮有墓田
本朝洪武二年慮天下貧民多以水火葬有傷風化
下礼部議民間死葬貧民無地所在官司擇近城空
地設為義塚今之漏澤園是也

事物原始卷三終

事物原始卷之三終

新鐫古今事物原始全書定分正名卷之四

明臨安徐炬明夫采朝
仁和張樸仲明校正

君

五峯胡氏曰盤古生於大荒莫知其始明天地之道
達陰陽之變為三才首君之始

皇

張愔帝系譜曰天地初判溟滓鴻濛即生天皇氏治
世此稱皇之始

帝

由天皇氏至燧人氏皆稱皇庖羲氏繼天而王史記
曰帝太昊伏羲氏此稱帝之始

皇帝

世皇帝記曰五帝之初有天黃皇帝之稱未聞稱皇
帝也秦始皇本紀云二十六年初并天下令曰六王
咸伏天下大定名號不更無以稱成功王綰李斯議
帝號曰古有天皇地皇有泰皇惟泰皇最貴上尊號
王為泰皇王曰去泰用皇采上古位號以為德兼三
皇功過五帝號曰皇帝秦漢以來至今仍之此稱皇
帝之始

王

按史記夏商之前皆稱帝至夏啓之甘誓始稱王曰嗟仲虺之誥湯曰惟王不遜聲色周時仍之

天子

春秋元命包曰神農氏之母女登感天而生神農人面龍顏始稱為天子說文曰古之神聖人母感天而生子故曰天子

官家

劉向說苑云鮑白令之對秦始皇曰天下官則讓賢天下家則世繼故曰五帝以夫亦為官三王以天下

為家蔣濟萬機論曰五帝官天下傳與賢三王家天下傳與子稱天子為官家猶言帝王也其義始此僧文瑩湘山野錄云真宗問李仲容曰何故稱天子為官家對曰蔣濟言三皇官天下五帝家天下兼三五之德故曰官家漢魏以來官中呼官家為大家出韻會官家又稱天家蔡邕獨斷曰官家亦稱宅家言以天下為宅四海為家出資暇錄

寡人

按史記云禹懸鐘鼓磬鐸以待四方之士曰教寡人以道者擊鼓論以義者擊鐘稱寡人始此

稱上

司馬遷作史記凡指斥君尊皆依違不正言但稱曰上今臣下呼天子曰上者皆由司馬子長始也

陛下

周以前天子無陛下之稱史記始皇時李斯議事始稱陛下蔡邕曰陛階也所以陛堂天子必有近臣執兵陳陛下備不虞臣與君上不敢指斥但呼在陛下者因卑達尊之義此秦禮也漢霍光奏太后亦曰陛下

萬歲

考古及周未有此禮戰國時秦王見藺相如奉璧田單偽約降燕馮諼焚孟嘗君債券左右及民皆呼萬歲蓋七國之時臣子慶賀于君亦呼萬歲秦漢以來臣子見君拜恩慶賀率以為常

山呼

漢武帝本記云元封元年武帝登嵩高侍御在廟傍咸聞呼萬歲者三迄今三呼以為定式而號山呼也

朕

朕者我也古通稱之史記李斯議天子自稱曰朕自秦始皇二十六年始

國號

後漢書班固典引曰太昊號庖羲炎帝號神農黃帝號軒轅燧皇而上止以自名未為天下之號也至太昊始以庖犧氏為代號云

年號

顏師古注前漢書曰自古帝王未有年號至漢武始稱建元元年按史記以一字紀元者始于漢文帝後元年漢景帝中元年以二字紀元者始于武帝建元元年以三字紀元者始于梁武帝中大通元年以四字紀元者始于漢哀帝大初元年將元年詳考立號以

紀元當自文景始

卷四

改元

檢自歷代人君初即位為元年中間並無改元者按
史記漢武帝初接位為建元元年二改元光元年三
改元朔四改元仲五改元鼎六改元封七改太初八
改天漢九改太始十改征元十一改後元

尊號

項峻始學篇曰天地立遂有大號即帝王尊號之始
堯之尊號曰放勳舜曰文華禹曰文命秦有天下李
斯王綰請上尊號曰泰皇唐高祖上元二年始稱天

皇中宗神龍元年上尊號曰應天皇帝玄宗開元以後宰相率百官上尊號以為常制宋神宗熙寧以上為虛名無實行遂罷之

上壽

通典曰禮有獻酬無上壽惟詩大雅云虎拜稽首天子萬壽豳風云為此春酒以介眉壽並無上壽之語始于戰國時淳于髡對齊威王有侍酒于前奉觴上壽之語春秋之間亦無聞焉疑即七雄之禮云

聖節

明皇雜錄云唐玄宗八月五日降誕是日宴宰相于

花萼樓源乾曜請以是日為千秋節休假三日長慶
七年十月十五穆宗誕日合天下府州縣置宴聖節
置宴始于此也

御袍

二儀寶錄曰唐武德初用隋制天子常服黃袍及衫
後漸用赤黃遂禁止士庶不得服其事自唐神堯始
也後又曰赭黃王建宮詞曰日色赭相似謂赤黃也
今俗又以天子常服淺黃為赭黃也

服御

唐會要曰天寶七年正月二十八日韋縠奏御案床

褥望去紫用赤黃制可然則天子服御之以黃自帟
韶之請也

索扇

唐書明皇時蕭嵩為相以為天子升降俯仰衆人皆
得見之非肅穆之容也奏請凡朔望受朝備羽扇于
殿上將出所司承旨索扇扇合上坐坐定去扇禮畢
上將退又索扇如初則此制之始自蕭嵩請也

賞賜

書曰車服以庸自唐虞即然商功懋懋賞周有車馬
器服之等此賞賜之始也

賞服

呂夷簡三朝寶訓曰建隆三年十月賜近臣冬服有司言累朝故事止賜將相學士諸軍大校太祖曰不賜百官甚無謂也宜並賜之自是文武常叅官悉及蓋唐以來品官在職即有衣俸罷即隨住太祖始通給也王沂公筆錄曰公服舊制冬亦單嘗賜單製太祖訝詰有司以前代之典上特命改製今有夾服自此始也

廊食

唐會要曰正觀四年詔所司于外廊置食一頓五代

會要曰唐室升平日常恭官每日朝退賜食謂之廊
食今起居幕中賜酒饌是也蓋自唐太宗始也

起居記注

漢武有禁中起居後漢明德馬皇后自撰顯宗起居
注蓋周禮左右史之事耳謂之起居注則自前漢始
也唐藝文志亦有獻帝起居注自茲歷代咸有也

時政紀

唐會要曰永徽以後左右史惟得對仗下後謀議皆
不聞姚壽請仗下所言軍國政要命宰相二人撰錄
號曰時政紀憲宗問李吉甫曰何謂時政紀對曰是

宰相記天子事以授史官之實錄也其事始于唐高宗時姚璿所請

借緋

通典曰開元八年二月勅都督刺史品卑者借緋及魚袋唐會要曰二月二十日也又曰舊制凡授都督刺史階未及五品並聽着緋佩魚離任則停則借緋之制自唐明皇始也宋朝賜緋者亦借紫而相承不佩魚

借紫

按通典曰唐武后天授二年八月右羽林大將軍建

昌王攸寧借紫衫金帶九月二十六日除納言依舊
着紫帶金龜則借紫之制自則天時武攸寧始也

太皇

漢因秦事母號皇太后故尊祖母曰太皇太后按史
記漢景帝二年孝文太后崩高祖之薄后文帝之母
景帝之祖母也此時未稱太皇及武帝即位司馬遷
儒林傳乃始稱太皇蓋竇太后好老子言太皇之號
自漢武始矣竇氏文帝之后武帝之祖母也

王后

三代以上並無稱后但曰王妃至周始稱妃曰王后

皇后

周禮天子之妃曰后周人稱王妃曰后秦稱皇帝始稱皇后漢高帝本紀七年漢王即皇帝位始尊王后曰皇后

太后皇太后

秦本紀曰秦昭王母芋氏號宣太后故范曄說秦王有獨聞太后之語以後趙孝成王新立亦有太后用事之說稱太后自秦昭王始漢襲秦故亦稱皇帝故稱帝母曰皇太后稱皇太后自漢始

太妃

帝王世紀曰黃帝始有元妃次妃之稱魏以來諸王之母始稱為太妃晉後妃傳章太妃周氏生哀帝拜貴人及即位有司議位號詔崇為皇太妃其事自晉哀帝始也唐真宗即位稱楊貴妃為太妃亦所生之母也

四妃

天官后妃四星其一為正嫡三為後宮故帝學取象于此立四妃而正嫡在其中然黃帝初有元妃嫫祖次妃嫫姆洎形魚氏方雷氏則是四妃之制自黃帝始矣三代有稱夫人而無妃號漢有貴人魏始置妃

此夫人號妃之始也唐初皇后而降有貴淑德賢是為四妃也

貴妃

宋孝武孝建三年初置貴妃位比相國又齊永明元年有司奏貴妃淑妃並加紫綬金章珮于寢玉

淑妃

魏明帝置淑妃齊永月中有司奏淑妃舊擬九棘以淑為溫恭之稱妃為亞活之名進同貴妃加比上司

德妃

隋煬帝置德妃北史后妃傳曰煬帝參詳典故自製

美名有德貴淑三夫人

賢妃

唐百官志內官有賢妃正一品注云因隋制有也而隋志及北史亦無其名當疑唐有國初置也續事始曰隋煬帝置德妃賢妃

公主

春秋公羊傳曰天子嫁女于諸侯至尊不自主昏必使同姓者王之故謂之公主蓋周事也春秋指掌碎玉曰天子嫁女秦漢以來使三公主之故呼公主也續事始曰自古至周天子之女有封邑至周中葉使

同姓諸侯主之故謂之公

長公主

賈林曰前漢婁敬說高祖以長公主妻單于武帝女亦稱衛長公主帝之姑為大長公主帝之姊妹為長公主後漢封縣公主諸王女封鄉亭公主宋朝但帝姊妹乃封長公主

縣公主

後漢帝女皆封縣公主或別為其名此疑稱縣主也始也其諸王公自為公主其父得自主婚故也隋唐以未雖諸王之女亦封郡縣但曰某郡縣主也

嬪

嬪婦官也古有九嬪曰淑儀南史后妃傳曰晉武帝初置淑儀為九嬪視為九卿唐百官志注明皇開元中置六儀其一日淑儀用晉事也國初省之曰淑容南史云魏明帝泰始二年置淑容自後或置或省國初亦省曰順儀北史后妃傳曰隋煬帝參詳典故置順儀為九嬪唐除之按唐百官志明皇開元中置六儀其四曰順儀曰順容隋九嬪有順容北史曰煬帝置宋真宗祥符中亦置順容之官曰婉儀北史后妃傳曰北齊文宣河清中置婉儀為八十二御女唐明

皇置六儀婉儀其四也曰婉容宋朝會要曰大中祥符六年真宗增淑儀以下至婉容凡六官並從一品在昭儀之上曰昭儀漢元帝置昭儀其後或省元魏置左右昭儀視大司馬北齊文宣時比丞相唐為九嬪也曰昭容漢孝武所置南朝亦或置之唐以為九嬪曰昭媛唐百官志曰唐因隋制有之但考隋志及北史俱不載疑唐制也曰修儀魏明帝所置隋煬帝以為九嬪脩容魏文帝始置之隋煬帝參詳典故典故復置之曰脩媛唐百官志曰唐因隋制置脩媛而北史后妃傳北齊文宣河清中置脩媛為御女唐以為

續曰充儀隋有充儀為九嬪唐會要曰唐武德以來有之北史曰煬帝置之曰充容按漢典有充容疑漢官也北史曰隋煬帝參詳典故著之于令曰充媛唐制云唐因隋制有充媛焉隋書及北史皆無文疑亦唐置之也

婕妤

前漢有婕妤班馬皆見于傳南史后妃傳叙曰婕妤漢舊號蓋漢置官也隋煬帝以為世婦而品正第二
通典曰漢武置婕妤視上卿比列侯

貴人

漢光武置貴人爲三夫人歷代不常有宋真宗復置
貴人也光武又置美人歷代多有之國初亦置之正
四品也通典前漢內命婦有美人

才人

南史曰晉武帝采漢魏之制三夫人外有才人又云
晉武所置而通典內命職漢有才人則疑漢置

夫人

唐虞夏商公侯之妻尚無夫人之號由周克商列爵
惟五于其封國皆稱君其妻皆爲夫人其事雜見于
詩禮雖皆命于天子亦無封冊之禮漢崔篆母師氏

通經學百家之言王莽寵以殊禮賜號義成夫人以則夫人之封自王莽始也蓋自魯昭公娶于吳爲同姓夫人始不命于天子至莽乃加封號云

太夫人

前漢文帝紀七年十月令列侯太夫人無得擅徵稱如淳云列侯子復爲列侯母稱太夫人蓋漢制也晉虞譚母亦拜武昌侯太夫人晉始加冊命

國夫人

通典曰宋鄱陽侯孟懷王母拜國夫人之始隋高宗女子洗氏世爲南越省領有功冊爲高宗郡夫人既

而冊譙國太夫人此夫人封郡之始也

封君

戰國時列國臣子有功者時皆封君秦孝公封公孫鞅為商君是也蓋未有婦人而封君者漢始有之疑取春秋小君之義爾

郡君

漢武帝尊王太后母臧兒為平原君平原漢郡此封郡君之始也武帝又封太后微時金王孫家所生姊號修成君此封縣君之始也唐制四品妻為郡君五品為縣君其母邑號皆加太君封稱太此其始也

制

劉勰文心雕籠曰古者有命無制周禮大祝作六辭以達上下其一曰命即制也蘇氏演義曰君上或命制而行之或禁制而止之稱制始于周時劉敞在西掖一日追封皇子公主九人立馬却坐一揮九制

勅

三代以上王者稱典謨訓制誓命凡六等總為之書漢初定儀制帝皇之命令始稱曰勅其勅用黃紙則始于唐高宗上元二年以白紙多蛀之故也以後尚書省下諸郡勅紙俱用黃唐中宗時常后等用事而

屠販納貲授官者降以墨勅斜封號曰斜封墨勅

誥

如康誥洛誥之類漢初太上皇稱之今太后亦稱之
又所以命官授職皆為誥以成湯為始唐初誥皆用
紙貞元後綾若賀王夫人恩命則用紫錦誥院勅郡
夫人使金花羅紙七張錦標袋盛之

詔

三代無詔秦始皇二十六年李斯議改命為詔之始
歷代因之其鳳詔始于後趙石季龍置戲馬觀其觀
上安詔書用五色絲繫于木鳳口中故曰鳳詔宋朝

大禮而御樓賜勅亦用之

冊命

漢儀四品一曰策書策簡也今冊命即是蓋始于漢書顧命曰丁卯命作冊書則漢緣周事也

宣麻

唐書百官志曰開元二十六年改翰林供奉為學士專掌內命凡拜免將相號令征伐皆用白麻則宣麻之始自明皇世也

檄

周穆王令祭公謀父作威讓之辭以責狄人此名檄

之始說文云檄以木簡為書長尺二會于楮上磨墨
作檄文司馬相如以檄喻巴蜀漢高帝羽檄徵天下
兵檄有急事則挿以鷄羽

事物原始卷四終

事物原始卷之四終